



CHANSON NEVE VAR SUJET UR CHLOAREC HAC E VESTREZ.

Var un ton neve.

TAD ar sperejou mad , à galon me ho ped
Da rei din sclêrigen da bosi va speret
Da ober ur chanson entre daou zen yaouanq ,
Ha d'e esplica sclêr d'ar re a vo presant.

Qent vit ma commancin ober ar ganouen :
Unan anê so mal hac un all femelen ,
Hac a deuyo souden a beb eil da barlant
An eil ouz eguale , hervez o santimant.

Elevet int o daou en ur memes contre ;
En eur respeti rent gant guir fidelite :
En eum heuillet int bet en o bugaleach ;
Abaoue ma sevont e reont davantach ,

Ó zud p'o deus güelet , a ra an disparti ;
Ar goas a so casset da boursuiv e studi.
Cetu int separer , ema o studia ;
Var ben daou vloas goude grêt e studi gantâ.

Da bemp bloas varnuguent da recev an urzio ,
Bet eo er seminer , bêleg sur e vez ;
Cetugar femelen bremàn abandonet ,
Mantrèt eo e c'halon , n'en dê qet hep sujet.

Bep mintin pa save ha pa zê da gousqet ,
E teu da zonch dezi demeus e douç Cloarec ,
En deus grêt e studi o c'hortos an termen
Da veza bêleguet , mes na vo birviqen.

Monet a ra ar goas vel un den languissant
Ha blesset e galon , da gaout e vestres coant ,
Bete gout ne dije chenchet a breposou ,
Ha laqet inutil o oll bromessaou.

Ar Goas.

Bonjour d'ec'h , va mestres , trist bras è va c'halon ,
O tonet ho pete gant peb affliction :
Mardeut d'am dilezel c'houi am grei languissant ,
Ha mar bec'h fidel din e zo fin d'am zourmant .

Ar Plac'h.

E zòn var an douar pemp bla varnûguent zo ,
Hac e meus ententet calz eus a rôsonio :
Drem'oc'h eus studiet , e credan oc'h eusc'hoant
Da zonet d'am goapât ; divoallit , den yaouanq .

Ar Goas.

N'e dòn qet deut amàn da gounta fablennou ;

Bezit ar vadeles da selaou va c'homzou ;
Ha parlantit ouzin, mar plich ganêc'h ingal,
Rac c'houi a meus choazet en plaç va bleurial.

Ar Plac'h.

Biscoas un den honest na meus droug res-
pontet,
En em anaout a remp hac a raimp bepret :
Contant òn da livra va c'horf ha va bue ,
Ha goude va oll vad , ar pez a meus anê.

Ar Goas.

Roete meus da entent ha d'am mam ha d'am zad
Ne vijen qet bêleg , ne voa qet ze d'am grat ,
E hen d'en em angaji evit mont d'an arme ,
Ha biqen n'am goueljent o retorn en bue.

Ar Plac'h.

Ar pez a lavarit zo vel pa vent scrifet ;
Mes bremàn e meus hast adare da glêvet
Petore respontchou oc'h eus bet , va mignon ,
P'oc'h eus annoncet dê ur gomz qen dirêson.

Ar Goas.

Accordet e zeo din ar pez meus goulennet
Pa guerfet , va mestrez , e vezimp unisset.
Laquit din un termen ha na vo qet re hir ,
Hervez ho polonte , evel m'oc'h eus dezir.

Ar Plac'h.

Qer bras ê va dezir , ha ma ê hoc'h hini ;
Me na c'houlennen qet donet da zeclari

**Ar virione qen sclêr dirazoc'h , va mignon ,
Rac aon na ven tromplet dre un tol trahison.**

Ar Goas.

**Chenchomp a breposou ha leqeomp termen
Da veza unisset hep retardi souden ,
Dre volonte Doue hac hor mam an Ilis ,
Me chenchimp a vue ha fin d'hon yaouanqis.**

Ar Plac'h.

**Omp en anter ar ziun , hirio eo ar merc'her ,
An termen a laqân , emei , va servicher ;
Tennit ho paperiou var an de diveza ,
Ma veomp embannet , e mei , dissul guenta.**

**Cetu an daou den-mâ demezet hac eureujet ,
Da uza o bue vel m'o deus prometet .
Chanç a souetân dê etre ma vint er bed-mâ ,
Ha goude o maro er gloar da jouissa.**

**Ar Chanson a zo grêt gant ur speret dister ,
Natif ha domicil a goste Landreguer ;
Demeus a vis guenveur , er bêvar varnuguent ,
Ebars er bla c'hoezec , evit rei da entent.**

FIN.



G U E R Z

SANTEZ ALIED LONGEART.

Me ho suppli, Bretonet, bourc'hisien ha noblanç,
MDa selaou ur voerz nevez leun eus a importanç :
Ar sujet d'e c'homposi a so ur femelen,
Hac e deus grêt goal vloaves en defot a guelen.

O Doue! Alied Longeart, goassa crim oc'h eus grêt,
Laza ho taou grouadur hep beza badezet !
Ma carjac'h beza sonjet en Providanç an êe,
Ho pije savetaet ene ho pugale.

E vije savetaet ene daou grouadur,
A so ganet er bed-màn divar an avantur.
Pa antre ar jandarmet en e zi d'e c'hemer,
Ne devoa qet ar gourach d'allout pronononç ur guer.

Mes e mam, ar vechantes, en e flaç a gomzas,
Va merc'h a so accuset dre valic ha dre gas.
Ar jandarmet p'e c'hlêvjont en e dorn e crogjont,
Hac e daou zorn adre e c'hein dezi a amarjont.

Hac e mam qerqent hac hi gant qerden garotet,
Ha d'ar prison da Roazon ractal voant cunduet.
Alied a lavare ebars prison Roazon :
O va Jesus adorabl! glac'har so em c'halon.

Rac guelet a rân facil an heur hac ar momet
Ma finisso ar vuez meus digant Jesus bet;
Ma finisso ar vuez meus digant Doue bet :
Vit savetat va ene, clasquit din ur bêleg.

Ar jolier, vel m'e c'hlévas, pront en qér a zo êt,
Eur religius santel gantàn n'eus digasset;
Eur religius santel gantàn n'eus digasset,
Er moment m'e deus goulet da gavet Alied.

P'e devoe côvessêet bete'r guir diveza,
E mam a fallas dezi un nebeut da garga :
Gout oun ervat, emezi, e zòn bet accuset ;
Mes dre'r c'hraç eus a Jesus muntrerez n'en dòn qet.

Pa bign Alied Longeart, pa bign ebars er squeul,
Ar religius santel a bign iveau d'e heul ;
Ar religius santel a bign qerqent hac hi,
Ha gaofàn bars en e zorn imach ar Grucifi.

Ha gantàn bars en e zorn imach ar Grucifi,
Evit laqat bep moinent da brezant dirazi :
Cetu amàn, Alied, so evidomp marvet,
Biscoas den var e varo n'en deveus rebechet.

Mar querit beza secret var ho mam hac ho c'hoar,
Jesus o c'heulio, va merc'h, bete sevel d'ar gloar :
Ne voa qet ar guir gantàn dija peurachuet,
Ar procurol-general er prison so antreet.

Ar procurol-general er prison so antreet,
Ha gantàn bars en e zorn paperassen pleguet ;
Ha gantàn bars en e zorn paperassen pleguet :
Cetu amàn, Alied, ho setanç, hoc'h arrêt.

Cetu amàn, Alied, ho setanç, hoc'h arrêt,
Ha d'ar prison da Bontreo e vezot conduit :
C'houi a yélo da grouga d'ho prô ha d'ho canton ,
Vit ma vezot punisset en ho jurisdiction.

C'houi a yélo da grouga da justic Sant-Thomas,
Evit ma veet guelet gant an oll bian ha bras ;
Hac an oll bian ha bras, Alied, o coelo,
Haç ho mam, va c'hoar Doue, a yel d'ar guér pa garo.

E tal Ilis ar Feunteuniou p'o deus-i bet rentet
Dirac Calvar Olivet e zeo bet daoulinet;
Dirac Calvar Olivet e zeo bet daoulinet,
Ar Groas hac ar Grucifi e deveus saludet;
Ar Groas hac ar Grucifi e deveus saludet,
An oll imachou divin var Calvar Olivet.

An oll imachou divin var Calvar Olivet.
Ouz an autrou brigadier jandarm e deus goulet :
Ouz an autrou brigadier jandarm e deus goulet :
Qent ma antrein en qêr ve va bisach mouchet.

Rac me meus eno querent a breudeur bêleyon,
Evel ma antrein e qêr e ranno o c'halon ;
Me meus er guêr-mâ querent bourc'hisien ha noblanç,
Evel ma antrein en qêr vo bras o dismeganç.

Alied a lavare var brênest e frison :
O Jesus! Roue ar gloar, glac'har so em c'halon ;
Me vel ar c'hargou fagot o vont da Sant-Thomas,
Hac aben creiz-de sonet em bo santet ar vlas.

Me vel ar c'hargou lan-se tont gant ar ru d'an traon ,
Hac aben creiz-de sonet e vin ludu ha glaou.
Ar jolieres gant truez ha compassion outi,
A chommas en e c'hichen evit e c'honsoli.

Tavid, Alied, va buguel, hac en em gonsolet,
Ar gurunen doubl er gloar a so déc'h preparet ;
Ar gurunen doubl er gloar so evidoc'h preparet ,
Sonjit e zomp en amzer eus ar gouân caled.

Ne guemerit en nep aon na spont en ho calon ,
Ar c'heunend-se so evit qêr demp da bourvision ;
Ne voa qet ar guir gante dija peurachuet ,
Ar bourreo deus a Roazon a antre d'e c'herc'het.

Bars e plac ar voulouzen ar gorden a laqas,
Ha cunduet d'ar maro da justiç Sant-Thomas.

Cri e vije ar galon, ha cri ma na voelje
En justiçou Sant-Thomas an hini a vije.

Truez ha misericord e voa dont d'e guelet,
Ha brassoc'h compassion e voa c'hoas e c'hlèvet :
Tostait, asistantet, hac amàn e clèfet
Ar boanniou ar c'hruella e deus ar Zantez souffret.

Ar boanniou ar c'hruella e deus ar Zantez souffret
En plaç e mam hac e c'hoar, hep beza meritet :
Oll asistantet devot, calz oc'h aze prezant,
Va c'horf a expos dêc'h oll ur melezour patant.

Bremâ-son en ho presanç e vo fin d'am bue,
Qent vit mervel e c'houlan un *Bater*, un *Ave* ;
Qent vit mervel, en hano Jesus ur *Bater*, un *Ave* ;
Me recevo va Jesus en e c'hloar va ene.

Goude m'o deus e c'hrouguet, var ar chariot lajet,
Dre bêvar c'horn Pontreo e c'horf paour voe traïnet ;
Dre bêvar c'horn Pontreo e c'horf paour voe traïnet,
Ha goude e oll memprou var ar rojou toret.

Neuze e teujont ganti da dossen Sant-Thomas,
Grêt ur bern tan horerus ma voe strinquet ebars ;
Grêt ur bern tan horerus ma voe strinquet ennàn :
Oll belerinet devot, pedit, pedit amàn.

Bet e deveus ar pouvoar digant Salver ar bed
D'accordi soulajamant d'an oll belerinet.
Qement a antre en douar gant güir devotion ,
A receo soulajamant en o affliction.

F I N.

E Montroulez, eus a Imprimeri LÉDAN.